

Aðalfundur íþróttafélagsins Vestra fyrir árið 2021

Haldinn mánudaginn 25. apríl 2022 í Vallarhúsinu á Torfnesi og hófst kl. 20.00. Á dagskrá fundarins voru hefðbundin aðalfundarstörf samkvæmt lögum félagsins.

- 1. Fundarsetning.** Guðfinna Hreiðarsdóttir, formaður, setti fundinn og bauð fundarmenn velkomna.
- 2. Kosning fundarstjóra og fundarritara:** Guðfinna lagði til að Sigurður Jón Hreinsson yrði kjörinn fundarstjóri og Sólrún Geirsdóttir fundarritari. Það var samþykkt. Sigurður tók við fundarstjórn og sagðist telja að löglega hefði verið boðað til fundarins og bar undir fundargesti hvort gerð væri athugasemd við boðun fundarins en fundurinn var boðaður á heimasíðu Vestra, www.vestri.is og facebook-síðum félagsins.
- 3. Fundargerð síðasta aðalfundar lög fram.** Fundargerð síðasta aðalfundar er að finna á heimasíðu félagsins, www.vestri.is Engar fyrirspurnir eða athugasemdir.
- 4. Formaður félagsins gerir grein fyrir starfsemi aðalstjórnar á starfsárinu 2020:**

STARFSSKÝRSLA FORMANNS AÐALSTJÓRNAR VESTRA 2020

KÆRA VESTRAFÓLK

Síðasti aðalfundur félagsins var haldinn 10. maí 2021. Engar breytingar urðu stjórn sem er skipuð Guðfinnu Hreiðarsdóttur, formanni, Guðna Guðnasyni, gjaldkera, Sólrún Geirsdóttur, ritara, Hjalta Karlssyni, Jónu Lind Kristjánsdóttur, Hlyni Reynissyni, Gísla Jóni Hjaltasyni og til vara Jónasi Gunnlaugssyni og Þorsteini Þráinssyni. Aðalstjórn fundaði sex sinnum á árinu og tveir formannafundir voru haldnir. Í þessari starfsskýrslu verður einungis tæpt á helstu viðfangsefnum stjórnar og vísast að öðru leyti í fundargerðir aðalstjórnar á heimasíðu félagsins.

STARFSEMI FÉLAGSINS

Eins og getið var um í starfsskýrslu stjórnar fyrir árið 2020 þá hafði Covid-19 mikil áhrif á allt starf innan félagsins það ár. Sama er að segja um árið 2021 þar sem áframhald var á sóttvarnar-aðgerðum, það komu tímabil þar sem allt var með eðlilegum hætti og þess á milli voru hertar sóttvarnaraðgerðir sem hömluðu eðlilegri starfsemi. Engu að síður var gróska í öllum deildum innan félagsins þar sem iðkendum fjölgaði og eftirtektarverður árangur náðist þrátt fyrir erfiðar aðstæður. Má þar helst nefna meistaraflokk karla í körfunni sem vann úrslitakeppni KKÍ í 1. deild í júní 2021 og tryggði liðið sér sæti í Subway deild karla. Meistaraflokkur karla í blaki átti líka gott tímabil í úrvalsdeild þar sem liðið komst í undanúrslit bæði í deild og bikar. Lið meistaraflokks karla í knattspyrnu endaði í 5. sæti Lengjudeildarinnar og fór alla leið í undanúrslit í Mjólkrubikarnum. Félagið fékk heimaleik á móti Víkingi R. en heimaleikurinn fór fram á höfuðborgarsvæðinu vegna vallaraðstæðna á Ísafirði. Það var ekki bara gríðarlega svekkjandi að geta ekki leikið svona mikilvægan leik heima heldur fylgdi því líka mikill kostnaður að færa leikinn til Reykjavíkur. Um starfsemi deilda félagsins er að öðru leyti er vísað í starfsskýrslur þeirra fyrir árið 2021.

REKSTUR OG FJÁRHAGUR

Ýmis mál komu inn á borð aðalstjórnar Vestra á síðasta starfsári og var húsaleigumálið svokallaða þar fyrirferðamest. Var komið inn á þetta mál í skýrslu stjórnar fyrir árið 2020 en um var að ræða uppsafnaða húsaleiguskuld deilda félagsins gagnvart HSV og fyrirkomulag á innheimtu húsaleigu vegna íbúða í eigu Ísafjarðarbæjar. Búið er að gera upp skuldina við HSV og breyta fyrirkomulaginu þannig að nú leigja deildirnar beint af Ísafjarðarbæ án milligöngu HSV. Lottótækjur fara þar af leiðandi beint til félagsins en ekki upp í greiðslu á leigu eins og verið hafði um árabíl. Þrátt fyrir að þetta einfaldi málið þá er það samt þannig að húsleigan er þungur baggi í rekstri deildanna og hafa

einhverjar skuldir safnast upp gagnvart sveitarfélaginu frá því að fyrirkomulagi innheimtunnar var breytt sumarið 2021. Er ljóst að deildirnar þurfa að taka húsnæðismálin til gagnerrar endurskoðunar með það að markmiði að lækka þennan kostnað í rekstrinum. Allar deildir, að hjólreiðadeildinni undanskilinni, eru reknar með tapi árið 2021 eins og sjá má í ársreikningi félagsins sem sýnir tap upp á tæpar 10 m.kr. Ýmislegt spilar þar inn í, ekki síst fjárhagsleg áhrif af völdum Covid-19, en því verður ekki kennt um allt endalaust og þurfa deildirnar að sýna ráðdeild og skynsemi í rekstri og gæta þess að sníða sér stakk eftir vexti.

FJÖLNOTA ÍPRÓTTAHÚS OG ÖNNUR ÍPRÓTTAMANNVIRKI

Annað mál sem hefur verið fyrirferðamikið í umræðunni er fyrirhuguð bygging knatt húss á Torfnesi. Þetta mál er fastur liður í skýrslu aðalstjórnar og á síðasta aðalfundi leyfði formaður sér að vitna í gamlar ræður fyrrverandi formanns þar sem nákvæmlega ekkert hafði gerst í málinu. En eins og við þekkjum þá hefur Ísafjarðarbær gert ráð fyrir byggingu knatt húss í fjárhagsáætlunum bæjarins undanfarin ár. Þrátt fyrir að verkið hafið verið boðið út í tvígang hefur það ekki skilað tilætluðum árangri. Í fyrra útboðinu kom ekkert tilboð og í síðara útboðinu kom eitt ógilt tilboð. Forráðamenn knattspyrnudeildar Vestra hafa lagt sig fram um að halda málinu vakandi og minna á það aðstöðuleysi sem deildin býr við og, eins og áður er nefnt, kom berlega í ljós þegar meistaraflokkur karla gat ekki leikið heima í undanúrslitum Mjólkurbikarsins vegna vallaraðstæðna. Á þessum tímapi punkti hefur enn ekkert hús verið reist en þann 22. mars sl. var undirrituð viljayfirlýsing íþróttafélagsins Vestra og Ísafjarðarbæjar þar sem Vestri lýsir yfir vilja sínum til að taka yfir heildarumsjón og ábyrgð á verkefninu. Í því felst hönnun, framkvæmd og fjármögnun á byggingu fjölnota íþróttahús. Ísafjarðarbær lýsir yfir vilja til að taka húsnæðið á leigu og greiða ákveðna upphæð á ári í tiltekinn árafjölda sem nánar verður kveðið á um í samningi þegar forsendur liggja fyrir. Að leigutíma loknum eignast Ísafjarðarbær húsnæðið að fullu. Samkvæmt viljayfirlýsingunni skal miða við að heildarkostnaður við verkið verði á bilinu 550-650 milljónir króna. Kostnaður við nauðsynlega undirbúningsvinnu greiðist af sjálfsaflafé/ sjálfboðavinnu og styrkjum sem Vestri aflar og/eða Ísafjarðarbær en sá kostnaður verður hluti af heildarkostnaði við framkvæmdina og þarf að samþykkjast fyrirfram af Ísafjarðarbæ. Innan Vestra hefur verið skipaður starfshópur til að vinna að málinu og skoða þær leiðir sem eru færar miðað við forsendur viljayfirlýsingarinnar.

Að því sögðu er rétt að minnst á skipulagsmál á Torfnesi en vonir voru bundnar við að eitthvað myndi gerast í þeim málum þegar Ísafjarðarbær skipaði sérstaka nefnd haustið 2020 til að fara yfir framtíðarskipulag fyrir Torfnessvæðið. Óskað var eftir tillögum, m.a. frá Vestra sem sendi inn ýmsar ágætær tillögur og hugmyndir. Því miður virðist þessi nefnd hafa dáið drottni sínum og útförin farið fram í kyrrþey. Málið er engu að síður brýnt og vonandi að þeir sem verði við stjórnvölinn eftir kosningar í maí taki þetta mál upp og sjái til þess að það verði klárað.

Lóð undir hjólapumpubraut er annað mál sem virtist hafa dáið einhvers staðar í völundarhúsi stjórnsýslu Ísafjarðarbæjar. Það var lengi að velkjast um í kerfinu hjá Ísafjarðarbæ og erfitt að skilja af hverju var ekki hægt að afgreiða það. Hjólreiðadeild Vestra gerði á sínum tíma uppbyggingarsamning við Ísafjarðarbæ vegna hjólapumpubrautar á lóð bæjarins við Grænagarð og var komin með drög að teikningum frá Velosolution en erfiðlega gekk að fá formlega staðfestingu á afnotarétti af lóðinni. Eftir mikla vinnu stjórnar var hjólreiðadeildinni loks úthlutað lóðinni árið 2021 eftir bið í vel á annað ár en sökum þess hversu seint það var náðist ekki að hefja framkvæmdir árið 2021. Væntanlega verður byrjað á þeim í sumar og ljóst að margir bíða spenntir eftir því að hjólapumpugarðurinn verði tekinn í notkun.

VALLARHÚSIÐ

Eitt þeirra verkefna sem íþróttafélagið Vestri hefur haft á sinni könnu síðustu ár er efri hæðin í Vallarhúsinu á Torfnesi sem þjónar nú sem félagsaðstaða fyrir Vestra. Það er þegar búíð að leggja

nokkra vinnu og fjármuni í laga þetta rými og fyrirhugað að koma þar upp eldhúsi og salernis-aðstöðu en væntanlega verður það ekki að veruleika í náinni framtíð vegna kostnaðar við slíka framkvæmd. Salurinn er nú talsvert notaður fyrir fundi og aðra viðburði af öllum deildum. Ég vil þakka Tinnu Hrund Hlynsdóttur sérstaklega fyrir hennar vinnu hér innandyra en hún hefur í vetur verið í heilmikilli tiltekt og betrubótum þannig að þetta sé aðlaðandi félagsaðstaða. Hún kom líka með hugmyndina að því að stofna sérstaka facebook-síðu fyrir Vallarhúsið þannig að auðveldara væri að halda utan um notkunina á salnum. Ég held að þetta sé allt að skila sér í aukinni nýtingu. Nú þarf bara að ákveða eitthvað gott fyrirkomulag á lykklamálum þannig að auðvelt sé að nálgast lykil að húsinu þegar eitthvað er um að vera.

FÉLAGSGJÖLD OG GETRAUNALEIKUR

Félagsgjöld hafa verið innheimt síðustu tvö ár og skiluðu 646 þ.kr. árið 2021 sem er ívið minna en fyrra ár. Til viðbótar eru tekjur af getraunaleik Vestra sem hefur gengið vonum fram og skilaði rétt rúmlega 1.600 þ.kr. árið 2021 sem er ágæt hækkun frá árinu 2020 þegar þær voru 1.250 þ.kr. Þessar tekjur er mikilvægar fyrir félagið þar sem þær eru nýttar til að standa straum af ýmsum sameiginlegum kostnaði, s.s. bókhaldskostnaði og rekstri á heimasíðu.

AÐ LOKUM

Ársreikningurinn sýnir að Vestri er stórt fyrirtæki, með veltu upp á næstum 170 m.kr., þar af er knattspyrnudeildin með um 110 m.kr. veltu. Við erum stór og við erum líka fyrirferðamikil, og pottþétt finnst einhverjum við vera frek og tilætlanarsöm. En það þarf bara ef fyrirtækið á að ganga og standa undir þeim væntingum sem til þess eru gerðar. Mikilvægast er að við, félagsmenn í Vestra, stöndum saman og vinnum saman að framgangi félagsins. Þannig náum við okkar markmiðum.

Á síðasta aðalfundi velti ég fyrir mér hvort Covid-19 myndi hafa áhrif á félagsstarf til framtíðar en þóttist sjá þess merki að fólkíð okkar myndi skila sér til baka þegar aðstæður leyfðu. Það reyndist rétt og það hefur verið sérstaklega ánægjulegt að sjá hvað hefur fjölgað í yngri hópnum hjá okkur. Hins vegar hafði ég áhyggjur af framtíð sjálfbóðaliðastarfs og þær áhyggjur hafa ekkert minnkað. Almennt eru menn á því að sífellt verði erfiðara að fá fólk til að taka þátt í félagsstarfi og jafnvel vandkvæðum bundið að fá foreldra iðkenda til að leggja sitt af mörkum til að börnin geti átt kost á því að stunda íþróttir. Þeir vilja, og finnst sjálfsagt, að þessi þjónusta sé til staðar en eru ekki tilbúnir að leggja á sig vinnu til þess að svo geti verið. En við sem hér erum vitum nákvæmlega að án okkar væru engin börn að æfa fótbolta á vellinum hér fyrir utan, eða körfu eða blak í íþróttahúsinu eða á hjólaæfingum uppi í hlíð. Og það væru engir meistaraflokkar þar sem bæjarbúar standa sameinaðir og hvetja liðin sín. Og ef við höfum ekki þetta, hvað höfum við þá? Hver vill búa í sveitarfélagi sem hefur ekki þetta sem við stöndum fyrir? Stundum er talað um máttarstólpa samfélagsins og það er einfaldlega þannig að það eruð þið og allir aðrir sjálfbóðaliðar sem leggja fram vinnu og tíma til að byggja upp gott samfélag. Takk fyrir ykkar framlag í þágu Vestra og í þágu samfélagsins hér fyrir vestan.

Áfram Vestri!

5. Lagðir fram endurskoðaðir ársreikningar félagsins. Guðni Guðnason gjaldkeri Vestra, lagði fram endurskoðaða ársreikninga sem samþykktir hafa verið af skoðunarmönnum félagsins. Hann fór yfir helstu lykiltölur í rekstri félagsins, einkum bókhald aðalstjórnar. Reikningarnir liggja frammi á heimasíðu félagsins. Fundarstjóri opnaði fyrir umræður um þá að lokinni yfirferð gjaldkera. Nokkrar umræður urðu um reikningana og sitthvað annað sem kannski hefði átt betur heima undir liðnum „önnur mál“. Það sem fundarmönnum lá helst á hjarta voru áhyggjur af uppbyggingu íþróttamannvirkja í bænum. Margar greinar eru í mikilli sókn – en aðstaðan er til skammar og engan veginn samkeppnishæf. Mikið svekkelsi að þetta skuli endalaust velkjast í kerfinu og kosningaloforð komast

ekki til framkvæmda. Loks voru skýrsla formanns og ásréikningar borin upp til atkvæðagreiðslu og samþykkt samhljóða.

6. Ákvörðun félagsgjalds. Guðni Guðnason, gjaldkeri félagsins, bar fram tillögu um að félagsgjaldið yrði óbreytt, þ.e. 2.000 krónur. Tillagan var samþykkt.

7. Fjárhagsáætlun lögð fram til samþykktar. Fundarstjóri gaf Guðna Guðnasyni gjaldkera orðið. Hann fór yfir helstu tölur í fjárhagsáætlun þessa árs og fundarstjóri opnaði síðan fyrir umræður. Tillagan borin upp til atkvæða og samþykkt.

8. Lagabreytingar. Fundarstjóri upplýsti að engar tillögur um lagabreytingar hafi borist fyrir aðalfund.

9. Kosningar

a. Kosinn formaður. Tillaga: Guðfinna Hreiðarsdóttir. Samþykkt með lófataki.

b. Kosnir þrjú stjórnarmenn til tveggja ára. Guðni Guðnason, Gísli Jón Hjaltason og Sólrún Geirsdóttir eru núna að ljúka tveggja ára kjörtímabili. Guðni og Gísli Jón gefa kost á sér áfram en ekki Sólrún. Tillaga um Hebu Dís Þrastardóttur í stað Sólrúnar. Fyrir eru í stjórn Hjalti Karlsson, Hlynur Reynisson og Jóna Lind Kristjánssdóttir sem voru kjörin á síðasta aðalfundi til tveggja ára. Engar aðrar tillögur bornar fram, samþykkt með lófataki.

c. Kosnir tveir varamenn til eins árs. Tillögur: Jónas Gunnlaugsson og Heiðrún Tryggvadóttir. Samþykkt með lófataki.

d. Kosnir tveir skoðunarmenn reikninga og einn til vara. Tillögur: Ásdís Birna Pálsdóttir, Sigrún Sigvaldadóttir og Gísli Úlfarsson til vara. Samþykkt með lófataki.

10. Önnur mál

Svavar Þór Guðmundsson greindi frá stöðu mála við knattspyrnuhúsið. Starfshópurinn sem nýlega var stofnaður til að halda utan um það verkefni fór strax í að skoða hvaða möguleikar væru í boði og reikna raunkostnað. Stríð á milli Rússlands og Úkraínu hefur hins vegar hækkað allan efniskostnað gríðarlega og mikil óvissa er framundan. Auk þess eru bankar tregir á að veita lán á viðráðanlegum vöxtum. Því er boltinn í raun kominn aftur til bæjarins. Í framhaldinu sköpuðust umræður um íþróttamannvirkin á svæðinu sem sum eru nánast óboðleg vegna skorts á viðhaldi. Ennfremur sinnuleysi bæjaryfirvalda hvað varðar umhirðu og uppbyggingu íþróttamannvirkja. Rætt var um stöðu deilda núna að afstöðnum heimsfaraldri og viðbrögð þeirra við taprekstri á síðasta starfsári. Almennt voru menn bjartsýnir á að geta rétt kúrsinn á yfirstandandi ári. Lítillega var rætt um nýtt kerfi, Sportabler, sem leysir Felix af hólmi við að halda utan um iðkendur og skýrsluskil. Best að félagið gangi í að fá sameiginlegt tilboð í kerfið. Mikið rætt um knattspyrnuhúsið, auglýsingaskilti, leiguhúsnæði og rútur til afnota fyrir leikmenn félagsins. Loks minnti Guðfinna á HSV þingið sem haldið verður þann 11. maí og mikilvægi þess að Vestri manni nýti alla sína fulltrúa á þinginu.

11. Fundarslit. Fundarritara var falið að ganga frá fundargerð og birta á heimasíðu. Fundarstjóri gaf þá nýkjörnum formanni, Guðfinnu Hreiðarsdóttur orðið og fól henni stjórn fundarins. Formaður þakkaði fráfarandi stjórnarmönnum, Sólrúnu Geirsdóttur og Þorsteini Þráinssyni, þakkir fyrir þeirra störf í þágu félagsins og færði þeim smá þakklætisvott fyrir hönd félagsmanna. Þá þakkaði Guðfinna fundarmönnum fyrir komuna, ágæta mætingu og góðar umræður. Að því búnu lýsti formaður því yfir að fundi væri slitið kl. 22.00.